

Tilman Lucke
De dode Bode
(schwäbisch)

Desch dumm:
Um Ulm herum¹
kommt heit koin Brief,
weil des Poschtausfahre ging dem doden Boden schief:
Der hockt dot am Sträßerand -
wer des war, isch net bekannt -
un a Spätzle hebt er friedlich in de Hand.

Mr sieht, daß an dem Spätzle noch an Zettel beppt,
mr kennt wohl z'erschter moine, 's wär' a Kochrezept.
Aber noi, des wär' ja Quark!
Uff dem Zettel beppt a Mark
mit Empfänger un Absender, des isch arg.

Leitle, heert mei Lied von sellem Må,
wo a Spätzle schicke will un scheidert drå.
Haut den Bode - heidenei! -
og'spitzt in de Bode nei,
bloß des Spätzle isch so au et bälder då!

Der Må isch in a Mådele verschosse g'wä.
Er isch sogar scho mål in ihre Stråße g'wä.
Sie wird dreißig morge, proscht!
Un au wenn's a weng was koscht,
schickt der Må seim Spatz a Spätzle mit de Poscht.

Oh, Mändle, komm, mach nåre, schmeiß in Kaschte nei!
Heit isch die letschte Leerung scho um virddel drei!
Glotzt uffs Ührle, noi, wie bleed:
Heilix Blechle, scho so spät!
Saut zum Kaschte, wo bereits der Bode steht.

Leitle, heert mei Lied von sellem Må,
wo a Spätzle schicke will un scheidert drå.
Haut den Bode - heidenei! -
og'spitzt in de Bode nei,
bloß des Spätzle isch so au et bälder då!

Der Bode tippt mim Finger sich an'n Meckel,
wie er des Spätzle sieht, un bäfft: „Du Seckel!
Desch ein ganz ein schlechter Scherz!“
Doch der Må faßt sich ein Herz
un erschlägt den Boden voller Liebesschmerz.

Hano, des isch dem Kerle fei arg ôåg'nem [unangenehm]!
Er hockt en in sei Audo z'rick, un außerdem
gibt er's Spätzle ihm in d'Händ',
un nå isch er awwer g'rennt!
Bloß dahoim hen se'n nå doch no g'schnappt am End'.

Leitle, heert mei Lied von sellem Må,
wo a Spätzle schicke will un scheidert immer widder drå.
Haut den Bode - heidenei! -
og'spitzt in de Bode nei,
bloß des Spätzle isch so au et bälder då!

Die Polizei, die steckt en in de Bau,
schickt Wasser ihm un Brot - un Spätzle au.
Bloß die Fraa, wo er verliert,
hat sei Spätzle nie berührt,
weil er war zu páb und hat's net g'scheit frankiert!

¹ Heilbronner Variante:
„In un von
de Stadt Heilbronn...“